

ما اتحبش

إن جيت للحق أنا ما اتحبش
 عصبية ورخمة ودمي ثقيل
 تشغلني النملة واشوفها كـ (فيل)
 لا باحب وادوب ولا باعرف اغير
 لكن أستاذة إني أطنش
 ضحكتي صعب ان انت تنوها
 باكره في الناس فرط فضوها
 أحلامي العالية اعرف اطوها
 من قبل عينيك حتى ما ترمش
 مغرورة وتنكة وعندية
 باهرب م الناس واسكن في
 السكة لقلبي مؤدية
 لطرق بتخوف وتلبش

إن جيت للحق انا ما اتحبش
 فرحانة بأحلامي وذاتي
 مش هاقبل ترسملي حياتي
 ولا تعمل قاضي لغلطاتي
 وتقول يا نكمِّل يا نفر كش
 مهتمة بنفسي وتفاصيلي
 مش مستنية الي ييجيلي
 ويخلص دمعي ومناديلي
 واتنكِّد وقت ماهو مفرفش
 مزاجية ومودي ماهوش ملكي
 تلاجة وبيعور تلجي
 هتقرب هيكهرب سلكي
 خليك أبعد وماتتغشش
 إن جيت للحق انا ما اتحبش